

四庫全書

集部

欽定四庫全書

集部

三華集卷十一至十四

詳校官中書臣覆照

助教臣常循覆勘

總校官進士臣朱鈐

校對官修撰臣吳錫齡

謄錄監生臣劉廷勳

欽定四庫全書

三華集卷十一

明 錢仲益 撰

錦樹集一

翰林修撰無錫錢先生仲益余嘗憶往年謁先生於京師之官舍見求先生之詩者戶外之屨恒滿及窺其稿則連編累牘蓋莫計其篇章何許也予曰先生之作富矣哉先生曰吾非務此以為名家

第不過應人之求之耳復曰吾藉此亦聊足以適
吾之興也別來有年嘗念其言之不置今先生已
矣條其族之賢者有曰公善公治得其遺稿曰錦
樹集者詩凡若干篇以余嘗交先生也徵序于其
首予聞先生盛年時博覽彊記惟場屋之文是務
後當元季以進士擅名于時及作縣華亭以學推
之政事至今有遺愛存焉若夫詩者特其餘事耳
矧其作也麗而不浮竒而不僻易而不俚而有詩

人之體裁者乎是宜為其族之子孫裒輯之以膾
炙人口也余嘗見前輩焦心勞思務於著作其作
有可傳者不鮮奈有卒至於湮沒無聞者焉何也
良由子孫不能有以成其志耳今公善昆季為先
生族之子孫而能不泯先生之所作亦可謂之賢
矣乎是則先生也亦奚憾焉是為序時正統二年
歲次丁巳秋七月初吉中憲大夫太常寺少卿蕭

山魏驥序

七言律詩

送傅教授赴建寧

都門秋日雨初收，送客携書赴建州。
典學不嫌官署冷，育材端沐聖恩優。
青燈黃卷關幽事，碧水丹山覓勝遊。
聞說郡齋諸士子，溪邊鵠立候仙舟。

中秋夜鄒侍讀置酒翰林中分韻得明字

露洗銀河夜氣清，玉堂文會集冠纓。
地高瀛海秋方半，天近詞林月倍明。
隔座送杯行令急，抽毫分韻趣詩成。

故人愧爾情何厚縱飲豪談過二更

寄安仁縣許安叔教諭

一命初登典學官遠煩書札報平安嗟予宦况憐遲暮
多爾交情重歲寒永夜燈殘吳雨冷高林木落楚江寬
幾回相憶渾無那再展來緘仔細看

送人復任南雄府同知

秋雨天街不作泥除書掌出午門西民懷遺愛車前拜
馬識曾遊陌上嘶雪冷梅花青鳥睡月明松影白猿啼

始興城下行春日還擁筭篋覓舊題

送人復任温州府同知

鴈蕩雲銷曙色開
山氓爭拜使君來
王祥自是三公器
龐統端非百里才
堆闕九重懷象魏
鰲峯咫尺望蓬萊
聖朝已絕黃柑貢
好待春來繞郡栽

送曾知州復任還歸州

空江潮上客帆開
報政新從闕下迴
御札已書盧奩最
州民爭望鄧侯來
猿聲夜落夷陵峽
鴈影秋橫滌滙堆

歸到永安須弔古杜鵑啼處有荒臺

送陳參政赴開封

西風吹雨濕旗旌八位秋登政府榮
梁苑花香鶯語亂隋堤雪霽馬蹄輕
威聲盡服韓弘令方峇咸知董晉名
試問夷門抱關客不知還復有侯嬴

送義門鄭尚書致仕回金華

都門日出早啼鴉送客江亭踏軟沙
白首拜恩辭玉陛錦衣歸老上金華
省中慣識尚書履海外咸知義士家

歸到故園春正好東風開遍碧桃花

送方給事中赴象州判官

當年給事直鑿坡出典方州意若何千里關山趨象郡
一篷風雨發龍河江雲漠漠詩懷壯汀草青青客思多
好為遠民敷善政盡令歌舞樂恩波

湛然軒

朱欄曲曲浸玻璃窈窕華軒俯碧池銀鏡寶奩寒不動
金沙玉礫淨無漪波光映月魚鬚見秋色涵空鴈影遲

盡日晏然惟默坐閒心惟有白鷗知

送祖韶石住持惠山

九龍山下古禪林新坐猊牀演法音百里烟霞俱改色
一門衣鉢自傳心風生靜室曇花氣日轉空亭栢子陰
陸羽泉邊舊遊處他時有夢亦相尋

送胡克初赴宜興陰陽官

其父老
得是職

星臺占候選才賢父子相承二十年自昔義和皆世守
由來太史得家傳隔几洞口看花屐晷畫溪邊載酒船

我亦久懷陽美好擬從詹尹卜求田

送人為御史得告還松江養疾事親

重捧徵書入帝畿
蒙恩仍許故鄉歸
罷騎驄馬身緣病
却憶鱸魚膾正肥
去國豈能忘戀闕
候門還喜見牽衣
鳳凰山下春如海
綵舞持觴拜壽闈

送范可大赴嵎縣教諭

憶昔看山入剡溪
學宮正在縣衙西
泉聲繞屋書聲雜
樹影當簷鶴影齊
二戴祠荒芳草合
五龍潭古白雲迷

爾持教鐸還登覽，煩向松間認舊題。

送解大紀遊北京

楊花如雪草如烟，壯士觀光北赴燕。
上國山河千里外，行都宮闕五雲邊。
黃金不惜收宛駿，白璧還看出薊田。
八月秋高遊覽畢，西風准擬候歸船。

送周季璉還廬陵

柳花吹雪點征衣，此日還鄉出帝畿。
千里山河飛夢到，一篷烟雨載春歸。
馬圖獨得尊周子，虎榜聯名讓宋祁。

閒說螺川春意好滿庭芳草綠陰肥

送鄧指揮進天壽節表回閩中

遠稱天壽入神京此日回轅趣去程雲漢星文天上動
閩關山色馬頭迎旌旗有影川如畫徒御無聲衆不驚
聖主祗今崇德化坐安方鎮答昇平

送周僉事赴雲南

薦剡蜚聲達四聰勅持憲節遠觀風鶴鶴顧我棲方穩
鸚鵡憐君賦最工白鷺洲邊晴放鷓碧雞祠下曉乘驄

莫辭萬里滇陽道雨露恩波四海同

送任參政赴福建

翩翩旌節下閩關昭代恩威被百蠻別駕舊聞留美績
政司新喜陟崇班詩題曉葉蕉花落酒熟秋林荔子殷
見說海邊東向望蓬萊咫尺近三山

送王府丞之雲南布政

當宁憂勤念遠人出臨方岳選廷臣聖朝有道華夷洽
造化無私雨露均通籍舊為金馬客安邊那事碧雞神

滇陽莫道天涯遠桃李東風一樣春

送刑部郎中赴四川按察副使

鸚鵡新登少昊司又乘驄馬向西馳天高雲路搏鵬遠
水滿江亭放鷁遲落日敗垣揚子宅秋風古栢武侯祠
錦官城下行春日遍省民風莫下帷

送僧赴建寧僧綱

江亭微雨濕袈裟去典宗乘向富沙風俗古來崇象教
雲山好處讓僧家松間磬響朝翻偈竹外烟飛午焙茶

轉見雪峯遺派盛金雞銜粟鳥銜花

送人赴合州學正

遠持教鐸赴西州聞說涪陵景絕幽
三峽山當城外起兩江水合郡前流
杏花壇上春風軟荔子林邊暑雨收
試覓元公遺化地滿庭芳草綠陰稠

送人謝病還建康

躍馬橫戈紫塞傍十年辛苦事戎行
論功錫爵皇恩重謝病還鄉野趣長
碧水丹山藤轎穩白雲紅葉苧衣涼

到家重結雞豚社醉飲扶歸帶夕陽

送薛僉事還桂林復任

報政旋歸趣去程匆匆未易展鄉情
清朝教化先風紀
烏府儀型屬老成
渺渺空江舟獨去
瀟瀟踈雨鴈初鳴
遙知八桂城邊路
剩有兒童竹馬迎

送刑部錢員外赴安慶知府

海門風急晚潮平
西過姑山五日程
三載理刑臨棘寺
一麾出守到桐城
竹邊鶴睡茶烟歇
花外鳩鳴穀雨晴

忠孝世家原未泯自慙同姓亦增榮

送人被薦赴泉州永春知縣

拜恩出宰赴桐城會散都門官馬鳴曉日九霄乘鷄薦
秋風萬里送鵬程籠懸鸚鵡呼人語盤貯擯椰勸客擎
見說海隅公事簡儘容詩酒味南烹

陳氏蒼筤池館

繞城栽遍碧琅玕庭際開池半晦寬魚鬣戲波雲影亂
鳳翎梳月鏡光寒灌畦種藥秋煙濕掃葉煎茶夕露團

咫尺市塵飛不到誰知小隱在長安

送沁州呂知州

都門日落馬頻嘶走送新州出郭西
章綬拜恩辭玉殿
檐帷出守到銅鞮月明荒戍鴉聲起
雲壓寒江鴈影低
若過太行還弔古好山多處定留題

送張知縣赴沅州麻陽縣

幾年給事直金闈出宰承恩上九溪
雲斷衡陽無鴈過
月明巫峽有猿啼菁茅供祭充包匭
蘭芷紉香雜佩觴

洞獠祇今俱服化坐銷兵甲事鋤犁

寄鄉人沈存耕余彥衡

涼風日暮起江濱迢遞幽懷入夢頻
戀闕溫道中禁籍思鄉默數舊交人
歲華忽忽愁中度髣髴星星病後新
何日聽松菴下路問花沽酒約尋春

題樂平進士素可達曾祖致堂先生墓銘

鄱陽素氏古名門卧雪高風澤尚存
助葬麥舟無義士傳芳桂籍有曾孫
白楊寒食瀟瀟雨紅葉斜陽遠遠村

迢遞清塘原上路短歌釀酒續招魂

和蘇伯厚檢討除夜直宿翰林詩韻

漏聲迢遞燭花殘坐對楸枰奕未闌
老境歲除偏感舊禁林春早不知寒
已誇後飲屠蘇酒未厭長飡苜蓿盤
獲覩太平無以報白頭猶喜一身安

和鄒侍講春夜齋宿翰林詩韻二首

雞人報曉已三號簇簇霞旌間綵旄
仙掌日來臨宸座御爐香動拂宮袍
九華簾捲龍顏近五色雲開雉尾高

願祝聖皇千萬壽玉觴長獻碧葡萄

又

雪映梅花月滿天看燈舊約又經年團茶膩點蘭膏淪
酥餅香和酪粉煎鷓鴣濫陪朝著列虫魚猶費簡編箋
玉堂夜直成佳會微曉談詩不得眠

徐母挽詩

綠鸞仙駕返瑤池寂寞春寒薄總惟飲器舊香猶未歇
鏡奩遺物忍重窺生芻遠致高人弔風木空增孝子悲

喜有玉堂文翰老大書賢德樹豐碑

為人賦雲門山房

官舍深居萬壑間每於退食掩雲闕半簾夕氣共籤冷
一榻秋陰蕙帳閒苔徑雨晴烏下啄松庭日暮鶴飛還
歸朝重聽軒轅樂莫過耶溪戀越山

送丁志善遊關西兼簡鳳翔秦知縣

漠漠烟蕪發棹謳送君迢遞赴西州百年歲月雙蓬鬢
萬里關河一葉舟華嶽松風迎曉日曲江花雨漲春流

岐陽聞有賢明府應為斯文下榻留

又為人送邵知縣

曾替白筆侍龍墀出宰三年報政時
聖主屢頒重任命故人爭賦送行詩
月明紫陌雞鳴早花暗丹山馬去遲
雲谷舊居聞尚在好因公暇拜先祠

荆溪書舍為邵知縣賦

堂年曾構讀書堂窈窕虛簷俯澗傍
卷畫水光晴灩灩銅官山色曉蒼蒼
日高香篆烟霏靜秋入燈窓雨氣涼

此去建安重典邑篋中留得舊螢囊

送劉檢討父還吉州

教子登朝侍禁闈阿翁投老亦光輝正宜就祿三牲養
底事思鄉一櫂歸北闕曙分霞彩散南山春老蕨芽肥
離心恰似孤雲影相逐征帆帶雨飛

送解檢討父還廬陵

都門官柳綠毵毵送別東風酒半酣螺渚遠天飛一鶴
龍河細雨立雙駮賢郎進講花欵帽阿父還家雪滿簪

料得孝思殊未極白雲千里望江南

為盧郎中賦富春山讀書處

富春山色蔚嵯峨窈窕書堂俯嵒阿釣瀨水紋浮几格
松岩雲影護絃歌芸窓夜冷螢光小蕙帳秋清鶴怨多
自入朝班登仕版時時飛夢繞烟蘿

題王克振使金華富春山圖

嚴陵城郭倚岩巒使節曾過七里灘
斷碣久漫蒼蘚滑高臺長鎖白雲寒
一時玄象干宸辰千古清風屬釣竿

登覽未窮官棹發
寫將幽景到家看

為丁先生謝醫士

寂寞丁寬久卧疴
喜聞投藥賴醫和
鍊成金液丹尤秘
傳得青囊術未訛
十畝暖雲芝草秀
一林春雨杏花多
老夫亦有迂疎癖
願乞靈方却病魔

送旭上人住虎丘

上人名德冠縹流
往主名山住虎丘
祇用荅禪舒一指
不煩迎衆趨三毬
雨香丈室花翻席
月冷空壇石點頭

却憶舊遊何日到因師飛夢遶滄洲

送孔審理還永嘉迎親就養

都內秋日淨暉暉孝子迎親得告歸
詩禮舊知傳聖學旨甘今喜奉慈闈
鯉魚吹浪衝船出烏鳥隨輿夾路飛
南望鴈山千里外梅花開日候征騑

送吳守信赴知莒州

昔年鄉校憶從遊聚散匆匆豈自由
五載理刑臨遠郡一麾出守典方州
馬蹄踏月都門曉鴈影橫空海溆秋

惆悵征帆留不住，載將離恨過瓜州。

三 用余彥衡韻題畫并寄懷彥衡

九隴峯高倚碧霄，停雲迢遞故人遙。
烏啼野樹留殘照，僧汲江船落晚潮。
鳳闕有金堪鑄馬，鯨波無石可為橋。
何時再著尋山屐，陸羽泉頭試木瓢。

代人送吳守信赴莒州

吳旣才氣自無雙，久典刑司滯一邦。
千里幃帷新出守，十千燈火舊同窓。
曉辭魏闕天連陸，夜發秦淮月滿江。

莫道莒城如斗大家家黍熟酒盈缸

代人送友人赴黃岩知縣

昔從鄉校憶同門還入金闈侍聖尊
虎榜登名收上第牛刀試手沐新恩
十年燈火書千卷萬里江湖酒一樽
南望鴈山何處是驪駒歌罷欲消魂

用任先生韻送楊宗浩鄉試回并簡錫庠三先生
詔啓秋闈選俊賢奎光五色映中天
子真才秀能收第我老聰明不及前
金榜拜恩朝帝闕瓊林錫宴設賓筵

儒師更盡菁莪育從此登瀛見後先

又送揚生浩中業還無錫

龍江秋水碧悠悠相送還鄉上綵舟
醉後暫勝醒後樂見時先為別時愁
京闈此日收高第鄉校當年憶舊遊
遲子明當春二月早扳蟾桂步瀛洲

謝沈存耕寄詩酒

濫跡詞林守一官每煩書札問平安
白頭顧我當遲暮青眼多君耐歲寒
詩寫綵箋披錦翼酒分清露落金盤

幾番細酌魚長詠
頓使愁腸一夕寬

黃庶子瑞菊

蘭臺公子玉堂仙
種菊開花別樣鮮
黃纈繖擎連理鳳
紫金釵綴合歡蟬
重樓芍藥羞呈艷
並蒂芙蓉敢鬪妍
不獨嘉祥應和氣
夕飡尤足致長年

為真上人題無錫華藏寺望湖亭圖

窈窕招提夾翠微
碧波千頃照岩扉
白頭僧向斜陽立
黃帽船衝細雨歸
遠樹細從湖外見
殘雲輕逐鴈邊飛

分明一片家山景却憶松間笋蕨肥

為尤溪

闕

賦雙峯書屋

岩棲一室寄高閒門俯清溪面兩山松影翠流絢帙上
書聲清起白雲間風泉坐漱猿同飲月徑行吟鶴共還
閒說韋齋遺化在至今賢士滿闔關

浦濬之家山圖

九隴峯連五里湖隱君居處似仙都人情大抵重鄉里
風景祇消看畫圖松下雨收栽藥圃竹邊烟起焙茶壚

嗟余廢盡箕裘業莫怪山靈笑老夫

橘林秋色為醫士賦

西風吹老洞庭香繞屋金苞映夕陽曾見禹書登貢品
未論荆樹儼封疆葉披江雨層層綠色染吳霜顆顆黃
憑仗仙翁神化力試嘗百病盡安康

寄朱逢吉時在昆陵治水

停雲迢遞楚江遙空館寒生恨未銷千里山川思故里
一年燈火見元宵風輕驛路梅花瘦春入都門柳色嬌

却憶故人朱太史幾時同趣紫宸朝

竺溪春曉為南昌劉氏賦

海色初分散曙霞水邊樓閣俯晴沙雨肥幽徑今朝笋
風掃閒堦昨夜花林下露稀嘶過馬柳梢月落起棲鴉
分明寫得承平景文獻由來出故家

贈張指揮

面如赤玉氣如虹早擁旌旗策雋功豈但襲官承世澤
又看執戟衛王宮贈人不惜千金璧射虎常彎十石弓

身荷聖恩逢治日好圖報國罄丹衷

題周原初鶴林卷

花雨繽紛墜法筵步虛聲起集胎仙
蒼松雲重垂瓊宇
瑤草春深長玉田風度鸞笙音縹緲
月明羽服影蹁躚
道人莫便乘騏驎又約安期上九天

為人賦筠溪

高人清趣滿滄洲竹下開軒事事幽
萬挺莓苔淇澳曉
一林烟雨洞庭秋鳳巢影落鉛華冷
龍窟光搖翠羽流

亦欲去尋詩酒社長年相伴謫仙遊

送僧住持溧陽西禪寺

曾居京刹五經年還入香山主法筵將謂曹溪無付囑
始知少室有單傳上堂領衆時行道陞座留僧每答禪
我亦久懷方外約擬從臨濟叩三玄

送蘇州郭指揮回韶州葬母

星行萬里赴韶陽端為慈闈掩壽藏自是聖朝崇孝理
喜聞賢將盡親喪龜趺載石揚光美馬鬣封墳湧若堂

吳下兵民相望久，秋風淮擬候歸裝。

再賦鶴林詩奉令作

琳館仙翁遠世機，每招白鶴伴林扉。
珠經誦徹松間聽，玉管吹殘月下歸。
清唳綠陰驚午夢，靜翻香露濕仙衣。
也知不是樊籠物，騎向蓬山頂上飛。

月夜聞簫奉令作

秋夜沉沉月正明，何人吹徹洞簫聲。
江空赤壁潛蛟舞，風靜瑤臺彩鳳鳴。
素影窺簾珠有思，餘音如縷亦多情。

莫驚楊柳都搖落，須合仙韶奏九成。

鍾山積翠奉令作

天設東華第一峯，半空獨秀碧芙蓉。
蛾眉膩滴秋嵐滑，螺髻橫堆夕照濃。
雲護寢園蹲玉虎，雨收觀闕擁蒼龍。
試看王氣清如海，永鎮山河百二重。

瑤池白蓮

銀塘秋水出瓊花，移向西池阿母家。
瑞挺萬枝明有色，香生千葉瑩無瑕。
風搖翠蓋流雲影，波動瑤杯滴露華。

疑是宓妃游洛浦，縞衣和月步金沙。

送禮部程郎中還南昌展墓

龍江水滿客帆開，十載還鄉亦快哉。
翊善舊曾居客邸，典祠今喜上容臺。
秋風桂檝行千里，暮雨松阡奠一杯。
身到豫章心戀闕，梅花開日候君來。

蕭山魯處士挽詩

少微星掩白雲遙，露冷秋墳蕙葉凋。
此日青螺遊錦水，何年黃鶴返丹霄。
歌成蒿里悲齊挽，賦就蘭臺費楚招。

幾度西陵原下路梨花寒食雨蕭蕭

送施員外赴南康太守任

久聞璧水早蜚英
晚向朝班始識荆
典選十年趨魏闕
剖符千里赴康城
帆開船尾篙師唱
鼓響沙頭驛吏迎
喜有紫陽遺化在
只消卧治答昇平

為王東白玄義賦懶雲

膚寸溶溶起石間
隨風飛去復飛還
半簾夕影龍紗薄
一榻秋陰鶴帳閒
有夢不驚巫峽雨
無心長戀冶城山

惟應大隱金門客，穩卧松巢日掩關。

送翰林庶吉士李衡回姑孰迎家

離思紛紛不易裁，江頭潮落錦帆開。
校書鰲禁登清選，折桂蟾宮負俊才。
落帽龍山人去遠，放舟牛渚客歸來。
新年定有于飛樂，一路春風入鳳臺。

送劉康成改思恩知縣

山河迢遞古宜州，歲晚趨程赴遠遊。
昭代取人先愷悌，邊氓施化尚懷柔。
嶺南春早花爭發，江上波光雪乍收。

老我結交今十載寸心萬里送行舟

送詹知縣赴定海

江畔蒲帆破曉烟官程催上甬東船未論琛貝充蕃舶
獨喜絃歌遍海壖山路雪消梅萼瘦驛亭春入柳眉鮮
相期不負求賢詔早樹芳名及壯年

和鄒侍講春日遊靈谷寺禮佛韻

曉出東郊過蔣陵禪宮高出萬山層座中見客多持呪
路上逢人半是僧問法擬從蓮社會續明還禮藥師燈

勞生未悟西來意欲究前生了莫憑

送金教授赴常州

三持教鐸播芳名昭代崇文屬老成拜命早辭雙鳳闕
買舟直到六龍城松亭日轉春陰薄芹沼風來夕氣清
若見學宮連博士定將善政告先生

送楊教授赴邵武

遠持教鐸赴樵川風送蒲帆破曉烟山入杉關青不了
水生劍浦綠遙連樹陰低拂先生帳荷氣濃薰博士氈

碧玉環中開講處分明高致似神仙

送陳參政復任河南

太丘公子十年交使節煌煌俯浚郊戀闕每懷葵向日
論心自擬漆投膠羨君報政重還任笑我逢人賦解嘲
遙想汴河堤畔柳青青千里拂旌旒

又

使君述職上朝端聖主加恩復舊官敷奏玉墀春色好
拜辭金闕曙光寒潁川父老懷黃霸江左衣冠仰謝安

此去梁園花未落馬頭楊柳正堪看

雲間張處士挽詩

讀書堆下草青青六十仙翁舊典刑
盛世正躋仁壽域浮雲俄掩少微星
賢郎筮仕司邦賦太史題文勒墓銘
遙想九峯應寂寞夜深風雨哭山靈

劔江書舍為人賦

聞說豐城寶劔靈神光長貫斗牛星
龜藏土蝕苔花澁龍去雲蒸水氣腥
誅佞底須煩束兔樹功何必費囊螢

紫泥拭透鵝膏瑩利器方期見發硯

為人賦雲溪小隱

延安府綏德州薛思誠所居也

窈窕書堂並水湄幽居端與養親宜蛟龍噓氣秋陰薄
鸞鶴梳翎晝景遲花滿雕山携酒處月明清澗釣魚時
太平始信幽風樂拜慶庭闈介壽眉

送王友諒赴龍泉縣學教諭

同郡人也

典教承恩赴括蒼萬山深處著黌堂李繁建學碑猶在
葉靖遊仙跡已荒泮沼水生揉翠浪少微星動燦寒芒

去家南望無千里好播文光及故鄉

又代人送前人

歲晚江空雪作寒松州迢遞白雲端傳經自昔關文化
典學誰云是冷官驛路梅花還可折馬頭山色正堪看
自憐曾作同門客空羨天池萬里翰

鄒氏歸田樂隱卷

昔年謫戍遠從軍投老歸田寂寞濱萍梗未嫌今日老
桃花不改故園春一犁烟雨開耕早千里江山入夢頻

官賦已輸徭役罷白頭長作太平民

送沈洪馬驄二友校書畢事歸縣學

昔時鄉校憶從遊喜入詞林與纂修
致理已知文化重賜歸重沐聖恩優
十年燈火三更夢千里江湖一葉舟
好整舊書加學力秋闈期滿占鰲頭

又

憶昔從遊二十年校書恩許入瓊筵
歸期不落梅花後離思遙隨鴈影前
供帳屢頒光祿酒東裝特攜水衡錢

老翁送別偏多感南望飛帆一愴然

丁亥十一月二十八日自壽

雙燭花生曉日晴年垂八十竟無成不羞白髮逢初度
猶及清朝見太平往事暗思渾似夢此身雖在亦堪驚
却慙食祿何由報只抱丹心答聖明

哭曾侍讀

一見論交誼更深豈期永逝隔幽沉已無鮑叔能知已
那得鍾期為賞音聚散總歸三酹酒死生不負百年心

老翁易動懷人感長慟臨風淚滿襟

又

三持使節赴交州萬里山河一壯遊馬援有身先許國
陸生無命不封侯旅魂耿耿還鄉夢歸旆翩翩下水舟
怕取來緘重展讀老年腸斷不禁愁

張司業挽詩

曾入南宮佐禮卿還登學省副司成共期施教俱成化
不道看花便隔生韓子有銘題竇氏何蕃無計惜陽城

若居地下修文館
騰啓奎光贊太平

挽蕭處士

薤上萋萋露未晞
哲人惆悵惜長違
方看賢子收高第
豈料浮雲掩少微
此日青驪驚已去
何年白鶴見重歸
我雖未識先生面
南望闔關涕滿衣

題滁州陳知州任滿入朝卷

南譙分竹已三期
報政趨朝覲玉墀
幙府上功書健筆
州民懷愛樹豐碑
樂遊歐老非因酒
多病韋侯不廢詩

聖主惜賢須復任歸時驅馬莫教遲

太僕吳寺丞昏山軒

繞屋青山四面圍時清太僕簡書稀烟嵐曉氣浮細帙
簾幙春陰捲翠微落葉易迷仙客跡夕陽長送醉翁歸
環滁勝地非沙苑苜蓿連天萬馬肥

送白上舍押鈔網往交趾

遠持使節赴交州萬里山川入壯遊島國盡今尊信寶
皇華端欲布徽猷星光貫斗通牛渚海氣浮空結蜃樓

送別不須重折柳
秋風咫尺候歸舟

初夏雨中書懷

卧聽鄰家午唱雞
官居寂寞似禪棲
枳花白墜搖風樹
菜甲青舒過雨畦
對案有書消永日
出門無馬畏深泥
白頭戀闕慙何補
終勝牛衣媿老妻

題蔡治中使日本卷

聖朝聲教被遐荒
疏爵東封日本王
象應使星臨析木
光搖海旭上扶桑
天吳潛避驚金節
地主趨迎捧寶章

歸報重腫應有喜九夷率職遠民康

三華集卷十一

欽定四庫全書

三華集卷十二

明 錢仲益 撰

錦樹集二

七言律詩

宋紀善梅花室

先生名詢
字文忠

賸栽琪樹遍書林
繞屋花開雪色深
一榻暗香侵曉夢
半簾疎影助清吟
每題婉麗珠璣賦
未害孤高鐵石心

惆悵廣平風度在逋仙千載是知音

溪山草堂

為工部王
主事賦

王維結屋占林泉風景分明似輞川
鳥落波光屏裏度魚翻松影鏡中懸
讀書坐愛陽坡草載酒行瞻遠浦船
已入冬官躋臚仕未應懷土憶當年

白彥奇江山獨步

八尺長身氣若虹地行仙子玉蟾翁
百年歲月孤筇裏千里江山一目中
布袖指邊知地脉芒屨到處驗民風

試看虎踞龍蟠勢萬世洪基帝業隆

李敘班望雲思親詩

白雲一片影霏霏孝子遙瞻目力微定向玉泉山上出
却來金殿闕前飛身同抱日從龍起心逐因風傍鶴歸
願托思親今夕夢薊門千里覲庭闈

無錫許允恭允升兄弟人才赴京詩卷

聖主求賢起隱淪許家兄弟更無倫雙珠並出生滄海
兩鳳連飛絕紫旻風雨一杯官舍酒鶯花千樹帝城春

嗟余十載長為客忽見鄉人意倍親

和王尊師與陳處士故所和詩韻

二老留題墨尚濃交情端有古人風
靈根採得曾烹犬
神艾收將解灸龍玉氣盡成雲蓋白
丹光長拚月輪紅
詩笥來往憑誰送應有青衣搗藥童

為僧賦萬山孤錫

高僧飛錫上神州問法參禪到處留
干木自隨長作戲
石頭原不礙行遊
凌空雲雨渾無跡
卓地泉源忽湧流

歸向五臺山上望海天萬里盡清秋

陳復靖州戍所回江山別意圖

萬里渠陽帶百蠻十年書劔戍黔關江山有待人重到
歲月無情鬢欲斑詩卷一囊行色壯別愁千斛酒腸慳
吳溪疇昔從遊地夢裏時時數往還

武城奚知縣考滿

鄉闈策士早蜚英小試牛刀宰武城六事有經三考最
寸心無累一身輕槐庭鶴睡茶烟歇麥隴鳩鳴穀雨晴

況是絃歌遺化地家家燈火讀書聲

建安童先生臨清書室

先生乃文公門人
童蜚卿七世孫也

考亭高第有諸孫九曲淵源澤尚存萬卷青緗新插架
一溪寒碧瑩當門金沙玉礫沉雲影寶鏡雲奩浸月痕
濯盡冠纓塵土氣滿懷清思與誰論

為陳尊師賦清隱

早依玄侶換冠簪大隱金門坐一龕樂演九成調玉管
經繡三洞啓琅函竹壇風靜秋陰薄松徑雲銷曉日酣

心境兩忘隨地寂天台何必勝終南

鶴溪書舍

書堂門俯碧溪流吟和惟從羽客遊蕙帳夢寒孤館曙
桐絲意入九臯秋種梅自擬西湖宅載酒還如赤壁舟
未信一瓢誇意趣已乘仙驥上揚州

題畫送劉參議赴四川

朝下天街響玉珂剖符除制出鑿坡馬從朱雀橋邊去
船向黃牛峽下過雪嶺勢因嚴武重錦江春得杜陵多

離亭目斷孤帆遠
遙聽烟中唱棹歌

和朱逢吉見贈韻
就送逢吉復往昆陵治水

考亭夫子玉壺清
文采風流莫與京
史館舊操麟筆重
使軺曾駕鷺車榮
陳登自有凌雲氣
孫綽何慙擲地聲
暫往東吳修水利
金甌當見覆佳名

又

天官傳制下西清
車馬蕭蕭早出京
銜命屢看馳使傳
歸朝重喜拜恩榮
白圭小智真非策
胡瑗通才夙有聲

從此毘陵無水患
貯看黎庶頌芳名

題江寧余知縣無聲詩境

為政誰云赤縣繁
心清不廢翫雲山
詩懷夙出玄黃外
眼界都歸粉墨間
佳趣遊神嘗蔗本
枯腸得句透仙關
寫成一段冥搜意
恍似鳴臯夢裏還

為人謝醫士張孟經

少年相逐在鄉閭
投老重逢闕下居
濟物屢焚賒藥券
傳家還有事親書
青囊深秘長懸肘
白髮婆娑每曳裾

我亦素多迂懶癖幸分刀匕為祛除

送劉秀才告老還上虞

當年選貢入京畿投老蒙恩賜告歸去國不忘葵藿志
還山重葺薜蘿衣櫓聲遠帶潮聲落雲影高隨鶴影飛
若到謝公携妓處好因登覽弔玄暉

和人韻贈徐野航

忘形來往不嫌頻老去交情久更真深肆日長惟賣卜
小樓天近別藏春梨花帶雨銷金粉柳色和烟染麴塵

須信太平民氣樂長安
還有謫仙人

己丑歲丁憂賜歸

十年羸馬踏朝班
此日蒙恩得賜還
故舊濫推年齒莫
鄉兒翻笑語音蠻
片雲望遠迷鍾阜
落日斜明映錫山
愧我白頭心戀闕
夢中常得覲天顏

寄舊友白

昔年曾客越王城
每憶當時夢裏驚
載酒放船懷賀監
煮茶聯句尚彌明
百年已結通家好
千里猶存念舊情

若見香山如問及為言白首困柴荆

送別越上友人范宗暉歸省

沙暖潮平促去舟老懷容易得悲秋
客中送客難為別江上看江不盡流
渡口鐘聲烟外寺山頭燈影雨中邨
寸心恰似秦淮月一路相隨到越州

題僧手卷

夜室棲禪欲二更忽聞念佛轉分明
要知說法元非法誰遣無聲解有聲
山月上衣初出定天風吹鐸盡和鳴

世間萬象皆空寂
識破根塵逐妄生

送王服周隋縣訓導

疇昔從遊若最賢
拜恩西上漢東船
江山路阻三千里
師友情親十五年
歐老舊居無復在
鄴都遺簡有誰傳
白頭相見知何日
目盡飛帆一愴然

送范宗暉歸越州

憶昨相逢縣學齋
又陪車馬踏天街
交情重似千金璧
世道艱如九折崖
曉夢隨風歸越絕
莫船和雨過秦淮

預期歲晚梅開日重到京師話別懷

又

秋風吹上甬東船重到家鄉二十年慈母倚門勞望久
嬌兒引袂笑相牽雞鳴野店三更月鴈度江雲萬里天
須念府公相候切早旋京師莫留連

賦得金鳳渚送李知縣赴清江

一曲清江繞郭流勢如金鳳立仙洲來儀瑞應文明出
覽德祥開禮樂修日暖影棲瓊樹曉雨晴光浴醴泉秋

聞君出宰爭先覩，還入華池覓舊遊。

琴軒為金華府

闕

同知賦

欲寫高懷託素琴，湘簾不捲郡齋深。清如幽澗寒泉滴，
和比朝陽彩鳳吟。已信絃歌能化俗，未嫌山水少知音。
于今正值文明運，一曲南薰萬古心。

和永春侯重遊幙府山寺贈僧詩韻

尋僧入谷曉光微，夾徑蒼松盡十圍。徙倚絕憐精舍好，
登臨空歎昔人稀。筵前聽法羣龍繞，夜際銜花百鳥飛。

珍重賢侯有佳趣每因吟賞夜方歸

又

何年釋氏入中州問法談禪盡貴遊地絕囂塵開淨域
身居尊勝尚溜流忘形不管柳生肘面壁底須茅蓋頭
悟得西來真實意元無戒業可持修

送華允莊還戍茶陵

當年結髮早從戎萬里橫戈策雋功歸夢不離親膝下
別情都在畫圖中山橫夕照雙飛鳥風送秋濤一葉蓬

好倚舵樓回首望九龍猶隔楚江東

和華賓賜菊花詩

河陽桃李不須誇種菊還輸靖節家
三徑舊栽分露葉一籬冷艷折霜葩
金錢錯落裁黃纈編練歲蕤翦素霞
收取落英和酒吸滿襟清氣不思茶

為華賓賜題王友石枯木竹石圖

羨君結屋俯清郊古木修篁蔭白茆
雨洗綠苔粘老榦風翻錦籜展新梢
巒石壓蛟龍窟重疊烟藏翡翠巢

占盡蓮蓉湖上景山林長結歲寒交

題馬桓仲扇淵明像次余耐貽韻

入室牽衣弄小兒青山繞屋水穿籬種來秫米烏先啄
開遍黃花蝶未知五柳清陰三畝宅千年高致百篇詩
獨留史策貞名在不逐當年晉鼎移

和余耐貽題畫韻

庭際涼風換暑氛夢魂只在白鷗羣虛檐夕氣浮清露
遠墅秋陰鎖白雲石角藤蘿纏虎勢樹皮苔蘚結龍紋

不知第二泉邊寺幾度鐘聲送夕曛

臨清樓

溪邊樓閣俯沙汀香几書囊映石屏半榻茶烟詩欲就
一簾荷氣酒初醒
牕橫日影魚吹絮琴點泥香燕掠片
幾度月明持鐵笛倚闌吹與白鷗聽

題畫

雨過春山踏翠微空濛嵐氣滴羅衣
焙茶人隔烟中語
戴酒船從鏡裏歸
遠樹似城迷岫幌白雲如海護岩扉

平生亦有滄洲約長憶松間笋蕨肥

和韻題畫扇

倦鳥投林晚欲棲隔溪烟樹色淒迷曉猿夜鶴何須怨
社燕秋鴻竟不齊老我愛閒身懶出故人許約手重携
循塘橋外西村路有興相尋覓舊題

送王伯濬戍沔陽

當年策馬被貂裘迢遞從戎赴沔州寶劍拂雲橫壯氣
清樽吸月洗春愁五更風雨頻聽角千里江山獨倚樓

聞說近年還故里菊花開遍一園秋

寄蘇伯厚檢討

疇昔詞林奉帝宸至今猶憶舊交人
聞韶共喜瞻儀鳳執筆何煩紀獲麟
對榻尚思風雨夢同袍不改歲寒親
梅花開盡無來使空負江南一度春

送歲貢生赴京

澤宮春貢選賢能萬里扶搖起大鵬
驛路鶯花三月酒夜聽風雨十年燈
雪消官柳黃猶淺水暖溪流綠漸增

自古讀書期報國老夫拭目看飛騰

遊蓬萊道院聽李天山鼓琴

仙人鼓琴花滿庭我亦洗耳為君聽風搖空林夜瑟瑟
泉落幽澗秋泠泠平生青袍作行客千載絕音聞廣陵
曲終日落醉歸去無數好山天外青

和月中丞韻

古刹城南二里遙黃金為佛玉為橋布衣不壞傳千劫
木塔重修記六朝法座講餘花作雨粥魚聲動海生潮

煩師指我三生事方悟前身不姓蕭

孫照菴來訪將赴京獻頌時年八十四歲賦詩送
之

江上春寒雪未消故人珍重泊蘭橈行囊歲月詩千首
客舍情懷酒一瓢白髮愛君思獻頌青霄得路羨登朝
嗟余潦倒方歸隱為語淮南莫見招

答方湖洪上人

方湖蘭若久荒涼重見高僧啓道場五色狻猊開寶座

諸天龍象拱金牀
慧燈再續千年燄
神鼎長薰百和香
慙愧佳章曾見寄
擬來相問扣松房

訪俞彥春

穢湖水暖滑無波
橫絕中流發棹歌
風景不殊人事改
春光雖好客愁多
梁鴻舊宅烟迷隴
彭祖荒墩草沒坡
羨殺塗林俞處士
年年種藥滿岩阿

郭廣文携酒見訪

強氏館中賦詩謝之

暫依山館寄書巢
慙愧干旄出遠郊
伏檻已消千里志

斷金不負十年交，盡知郭泰能推獎。
自笑揚雄費解嘲，相見莫教容易別。
祇愁斜日下林梢。

寄潘克誠

折柳都門又見春，別懷況是故鄉人。
京居有肆知君達，墓祭無田歎我貧。
此日寄書那憚數，當年賒藥不嫌頻。
多情只有青青草，客路衡門一樣新。

哭耐聒

春風送我出都城，別後那期便隔生。
千里江山離客恨。

百年詩酒故人情塵蒙舊几書囊暗風颭空帷燭影明
一命未霑身已歿滿襟哀淚不勝傾

又

西風策策雨霏霏嗟子登朝去不歸守道螢牕勤學業
校書鼇禁足光輝玉樓召記知多少地府修文果是非
老我一襟知己淚潛然零落滿羅衣

題畫

窈窕山中處士家蒼藤蓋瓦竹穿沙碁聲時出松陰裏

詩興還生野水涯
千嶂曉光搖翠壑
一簾秋色散青霞
山童知有人來訪
擁篲迎門掃落花

又

輕陰銷盡午烟開
獨立沙頭踏徑苔
鷗外水光浮日去
鴈邊雲影帶秋來
已憐范蠡無仙骨
誰識嚴陵有俊才
却上高丘西北望
紫山遙隔鳳凰臺

送薛理常赴京

聞說徵書下海隅
觀光此日上亨衢
九霄風翮河東鳳

千里霜蹄冀北駒始信藍田多美玉未容滄海有遺珠
于今禮樂皆完具不用孫生笑魯儒

為醫士題畫

青山重疊路微茫松桂幽深暎野堂千塢白雲芝草秀
一林疎雨杏花芳猿聲乍歇春陰薄鶴夢初回曉色涼
不用更歌招隱士漢庭今已起韓康

哭鄒伯暘

故人長逝隔泉宮投老哀情易感中久仰魏舒成甯氏

豈同王衍忌羊公露寒宿草松阡迴月冷虛堂蕙帳空
南望招魂歌楚些一緘和淚托飛鴻

七夕奉令作

秋來七夕是佳辰涼入虛堂夜氣新獻賦已輸王勃麗
晒書何愧郝隆貧星移銀漢懸珠緯露下金莖洗玉塵
憑仗天孫休賜巧清時風俗自還淳

又

滄海雲收碧落高報秋梧葉下庭臯青鸞傳信真為遠

烏鵲填河莫告勞
零露潤露黃篾簾
輕颺涼入絳紗袍
君王已在長生籍
何待瑤池獻玉桃

題沈存耕雲山隱居

翠微深處著蘿庵
滿座秋花點石楠
萬壑烟霞飄几席
一村雞犬隔雲嵐
司空久負三宜去
叔夜端知七不堪
莫笑市廛無夢到
半簾紅日睡初酣

寄高郵何士達

武陵城下湧金門
曾記看花載酒樽
遠別憶君千里隔

故交惟我兩人存白雲近海山邊樹紅稻臨淮水畔村
欲寄尺書遙問訊寫成一字一銷魂

陳萍翁挽詩

陳君家世卷中知文采儒林見羽儀每歎蘇門鸞去遠
却憐華表鶴歸遲半生未恨漂萍梗二子終看折桂枝
南望桐山原下路楚歌釃酒不勝悲

題梅存堂

南昌劉處士母梅氏嘗植梅于庭其母
歿因扁所居堂曰梅存以識孝思之意

云

手種江梅念母恩
堂前五玉立伴黃昏
冰肌瘦怯春寒力
縞袂香沾粉淚痕
月落羅浮驚曉夢
雪消姑射返仙魂
高樓切莫吹羌笛
留對瓊芳酌一樽

送人復任南海知縣

秋雨都門一尺泥
江頭送客馬頻嘶
地連南海星辰動
天近東華日月低
夾路梅花孤鶴立
滿庭榕葉亂鷺啼
越王臺下經遊處
還向琴堂覓舊題

三華集卷十二

欽定四庫全書

三華集卷十三

明 錢仲益 撰

錦樹集三

五言律詩

送監生葉師古得告侍親還天台

親老求歸養君恩許放還未應忘斷織
端憶夢持環天
遠龍河驛雲連鴈蕩山遙憐到家日
擎酒拜慈顏

寄題王仲淵西爽軒

結屋並山阿，羣峯擁翠螺。
秋清金氣肅，日轉竹陰多。
拄笏題詩坐，開簾對酒歌。
王猷有佳興，問訊近如何。

送王服周赴蘄州廣濟知縣

宿雨曉初晴，之官第一程。
行囊詩卷重，別舸布帆輕。
白髮悲離合，青山管送迎。
蘄陽在何許，萬里故人情。

題趙仲穆畫

王孫有遺墨，風景似苔溪。
小艇垂綸叟，孤村唱晚雞。
秋

清紅葉瘦日暮碧雲低一段滄洲意何由覓舊題

為太僕祝少卿賦西山暮景

白首膺皇眷清時位列卿丹心衰轉壯大器晚方成
松栢經霜茂桑榆暎日明誰云臨暮景未覺負平生

送人復任撫州知府

報政上朝端承恩復舊官選司書考最野老說民安
山瘦秋容淨江空夕氣寒送行詩滿軸携取到家用

王知縣柱笏齋

樊山王茂宰公退有餘清手板搢頤坐心詩適意成遠
峯橫爽氣高樹發秋聲自得幽閒趣悠然太古情

小軒為人賦

有美黌宮士窮經閱小軒神清緣寡欲意適在忘言戲
水潛鱗泳趨林宿羽喧眼前俱妙趣奚必隱丘園

送邵知縣復任建安

宰邑向甌閩朝天拜紫宸名因憲府重情為故鄉親

邵先

任御史與予同郡人故云馬度杉關曉舟行建水春文公遺化地風

俗喜還淳

挽高待詔母

令子登朝日慈親棄養時
訃從千里至痛徹九泉悲
曉露悽萱萼嚴霜落桂枝
到家應淚盡莫廢蓼莪詩

送太僕祝少卿復任

奉車登太僕考績覲明廷
富國豈無政擾龍還有靈
列卿惟皎月天駟應房星
試看滁陽道連山首蒼青

謝墨工遺墨

朝下過東城俄逢子墨卿玄珪礬玉質翠餅擲金聲未
讓潘生技何慙李氏名感君持贈我翻愧學無成

贈醫士

結屋棲仙隱馳名滿帝鄉免分新搗藥龍獻秘藏方樹
白花經雨林黃橘帶霜不因無貳價誰識是韓康

送儲助教除天台教諭

太學三年久滇陽萬里迴申公原有道王式豈無才客
計詩千首鄉心酒一杯清朝尤重士典教赴天台

醫士許可齋卷

往昔住南徐今來闕下居藥囊無貳價家具有遺書應
客惟稱好謀生不顧餘未容耽隱趣早晚起安車

張主簿著存堂

罔極親恩重孤生孝感深羹牆長在目聲色不忘心蒿
里秋霜慘松阡夕照陰慈烏如有意夜夜吐哀音

送姜訓導赴嚴州分水縣

聞說桐廬郡千峯鎖白雲學宮山外起江水郭前分世

美嚴高士民懷范使君先生持教鐸重喜振斯文

秋日病中述懷

時禁屠宰

老去偏多病秋清易感懷不眠思往事損食助長齋
廩祿慙虛受時情悵寡諧平生憂國意未忍即沉埋

送張孟約知縣赴邵武之泰寧

出宰赴樵川閩關路幾千聖朝崇德化縣令得才賢
俗美家勤學民淳戶力田梅花開正盛一路引官船

丁亥除夜懷黃生

生時在交州

絕域投荒客窮陰欲雪天
今宵又除夕何日是歸年
孤燭三更夢空江萬里船
老翁寧再見撫景一潸然

又

念爾謫交州孤身萬里遊
今宵是除夕何處泊行舟
寄信無來鴈知心有白鷗
幾番過舊宅不忍重回頭

西甌黃知縣復任

百里蜚英遠三年考績優
丹心馳北闕遺愛滿西甌
曉鴈穿雲度寒江入海流
邑民相望久歸任莫遲留

寄烏程黃教諭

苦憶黃夫子經時絕信音
江山千里別風雨十年心
驛路梅花落都門柳色深
因風聊問訊飛夢亦相尋

建寧孫通守西園清興

園池占佳勝草木發華滋
酒熟春歸早花明月上遲
倚楹長至旦愛客不知疲
出守閩中郡翻懷舊隱時

送歲貢生許麟

送子上京師離懷何處悲
酒邊將別際馬上獨歸時
夜

雨銷梅粉春風拂柳絲平生讀書意莫負夙心期

錢達可山房

苦憶錢夫子幽居嶧嶺山問梅殘雪外採藥亂雲間塵
暗芸籤冷香銷蕙帳閒斷腸泉上月依舊照松關

欽定四庫全書

三
卷十三

三華集卷十三

欽定四庫全書

三華集卷十四

明 錢仲益 撰

錦樹集四

七言絕句

為人賦松菊圖

松髯挺秀菊揚芳
三徑都荒獨傲霜
甘向歲寒存晚節
讓他桃李占春光

內館與曾侍讀聯步夜歸

夜深聯步出南宮
臺殿參差月滿空
銀鑰未收鈴索靜
恍然身在五雲中

和鄒仲熙侍讀題畫

酒醒春風細細吹
綠蘿樹下碧雲垂
車塵不到高山下
長伴仙人看奕碁

又

雨晴新綠長鷗波
地僻渾無轍迹過
亦欲買山尋隱計

不知何處白雲多

又

十年車馬逐京塵
酒侶詩朋念舊因
記得昔時秋社散
杖藜扶醉過西隣

又

搔首西風鶴髮稀
楚江烟樹望來微
何人得似溪翁樂
釣得鱖魚換酒歸

題琴高乘鯉圖

聞說琴高是水仙每騎赤鯉赴瓊筵酒闌還踏金鱗去
海氣侵肌浪拍天

題梅花雙鵲圖

梅花枝上鵲雙棲一片梨雲壓羽衣好向翰林常報喜
不須三匝歎無依

題漁樵問答圖

負薪出郭憩林邊偶值漁郎泊釣船却憶杏花壇下路
更無人解聽絲絃

又

負薪出郭賣魚歸，偶見相忘坐石磯。
拍手縱談開口笑，不知人世有輕肥。

螳螂捕蟬圖

嘒嘒玄蟬得意鳴，綠楊陰轉午風清。
螳螂莫鼓當車臂，誤遣琴聲帶殺聲。

題畫寄長史

青山疊疊水粼粼，迢遞停雲憶遠人。
落盡梅花無驛使，

京華又是一年春

題畫白蓮花

一枝寒玉淨無瑕
翦作瑤池九葉花
渾似宓妃遊洛浦
縞衣和月步金沙

又

天然秋水出芙蓉
素質娉婷怯曉風
坐對玉堂涼夜永
祇疑明月墮龍宮

題竹

吹徹瑤笙酒未醒
月明移過竹西亭
玉堂夜永清無寐
坐看飛霜落鳳翎

畫白頭公

秋風小樹結紅梨
山鳥雙棲占一枝
正值太平無彈射
白頭相守不相離

送葉審理還三衢

宰邑青年若最佳
曳裾門下更清華
共知鶴禁無雙士
曾折蟾宮第一花

為僧題畫竹

故人迢遞碧雲遙，吹徹西亭紫鳳簫。
白鶴未眠山月上，滿庭寒綠夜蕭蕭。

又

一拳寒玉種疎篁，僧館高深夕氣涼。
一片好懷無處寫，半簾秋影落吳霜。

釣魚圖

江上垂竿晚未收，鯉魚風冷荻花秋。
乾坤萬古詩人思。

都在滄浪一葉舟

題畫

一椽茅屋占烟霞
雲樹沉沉帶晚鴉
不是隔林聞笑語
那知深處有人家

題菩提葉圖

菩提葉薄翦鮫綃
誰倩良工巧筆描
貌得溪山無限景
祇愁化作綵雲銷

又

亂山重疊水逶迤
髣髴三湘帶九疑
一片葉中都著盡
恰如芥子納須彌

水仙花

金杯承露玉盤擎
仙子凌波步機輕
洛浦孤山俱絕品
梅花未必合為兄

梅花寒雀圖

啾啾寒雀聚花間
啄落瓊瑤滿地斑
殘雪未銷無覆粟
不知還似紇干山

題畫

手種家園五粒松滿庭流翠夕陰濃至今一片梢頭月
猶照龍山九點峯

為僧題畫竹

當年書劔客胡溪長就鄰僧竹上題此日看圖重感舊
白頭回首意都迷

又

爾從祝髮記從遊竹外僧房事事幽忽覩一竿烟雨色

悵然重憶故園秋

又

僧房移植翠琅玕洗雨梳風作夏寒
寫入畫圖長在眼
不勞日日報平安

墨梅

珠樹斜臨洗硯池墨痕吹上半開枝
香魂不散冰心在
一任玄霜染玉肌

又題畫竹

楚楚幽篁石上生
滿庭秋影月華明
鶴眠不穩龍吟細
併作禪心一味清

再題水仙花

露洗寒花月下開
黃金為盞玉為臺
無端移種山房內
長作香雲入夢來

又

綽約金盤一段春
凌波羅襪起秋塵
仙花自是無情物
虛遣陳王賦洛神

王孟端為朱希顏畫竹

王朱皆鄉人也

王郎妙墨竹傳神
朱老交情更可人
同是故鄉同在客
相逢只說故園春

夢黃生理

爾謫交州幾日歸
南行萬里信音稀
昨宵夢裏分明見
覺後空令淚滿衣

題畫

疎樹斜陽帶夕霏
草亭分得釣魚磯
悠然一片滄洲趣

坐對青山看不歸

和王孟端韻

江水流寒鴈叫霜停雲迢遞楚天長年來聞說三槐樹
養就繁陰蔽畫堂

又

蕭蕭兩鬢點吳霜老去思歸客夢長只有九龍山上月
夜深來照讀書堂

和人韻題張真人畫竹

渭川春雨楚山秋
翠落寒波滑欲流
昨夜葛陂龍起處
滿空雲氣不曾收

又

艤棹湘川誦楚騷
滿林寒玉撼秋濤
夜深酒醒推蓬看
月冷江空碧落高

為太學張真秀才題畫竹

一枝秋色露華寒
金粉香生濕未乾
養就瑤林棲鳳幹
直排閭闔獻琅玕

題會友圖

午坐松亭理玉琴滿庭疎翠落秋陰故人珍重來相訪
一曲陽春萬古心

題錢教授九世祖繹翰林額外醫官誥上有秦檜
相銜不見書名

額外醫官特賜恩當年通籍九華門也知濟物陰功在
誥命留傳九世孫

又

錢氏流芳直到今
五花鸞誥織泥金
由來自古崇文教
特賜醫官半翰林

又

翰林官誥錫恩榮
千載重看眼倍明
最喜故家文獻在
幸教姦檜不書名

題秋日林亭畫

雨洗烟嵐夕氣涼
冷風激激樹蒼蒼
采香亭下看雲處
零落秋花滿石牀

題畫扇

迢遞家山入夢遙
白頭猶趁紫宸朝
畫中認得陳莊路
茅舍疎林獨木橋

題畫

琪樹秋陰薄翠峯
金沙開盡玉芙蓉
夢中尚覓看雲約
知在仙山第幾重

為雷秀才題竹

暖律潛回曙色新
湘雲浮動碧鱗鱗
鸞舞罷黃鸝語

別有書齋一段春

右寒谷朝陽

又

瑤浦秋清鶴未眠
冷風激激露涓涓
江空月落無人見

鼓徹湘靈五十絃

右湘濱曉露

棠梨錦鳩圖

為王仲淵賦

棠梨枝上立雙鳩
喚雨催耕豈自由
飛入爾家知有意
他時當化作金鈎

題墨竹

楚楚幽篁並碧梧
玉枝翻露濕珊瑚
莫將如意輕敲折
留待他年宿鳳雛

又

娟娟修竹起林坳
露洗風梳冷玉梢
只恐綵鸞棲不穩
粉牆遮斷碧雲巢

又

一枝老竹半無梢
曾結岐山彩鳳巢
莫道霜風便摧折
此君不負歲寒交

又

一竿秋碧起烟村又喜孫枝發舊根試看資深堂下月
尚留清影照黃昏

題畫

涼雨初收鶴夢殘冷風吹動玉珊珊濯纓亭上看雲坐
零落秋花滿石壇

又

數椽茅屋倚長松翠壁丹崖隔萬重山寺不知何處在

白雲林外一聲鐘

又

松林日轉半牕明
紗帽籠頭白苧輕
今喜聖朝文化盛
薜蘿陰裏讀書聲

又

石壁飛泉掛玉虹
曉烟吹散綠蘿風
白雲深處聞雞犬
知有人家住崦中

又

青山無脚樹無根
烟水微茫見遠村
渾似昔年秋雨後
若耶溪上望雲門

又

窈窕茅亭俯澗阿
湘簾不動午陰多
落花風定茶烟歇
時有書聲出薜蘿

題畫梅

玉仙肌骨淨無塵
雪色生香畫未真
政恐樹高難就看
隔林斜送一枝春

題扇面竹枝

齊紈新製月團團
入手能生六月寒
好是吳剛持快斧
斫開仙桂種琅玕

題畫竹

涼風吹動晚煙收
鸞尾翻翻翠欲流
一夜山牕眠不得
草堂無處著清秋

又

欲寫琅玕寄所思
夜涼吹盡玉參差
西亭酒醒推牕看

月在棲鸞第一枝

又

冷風激激樹蒼蒼
筠館高秋夕氣涼
白鶴未歸山月上
滿簾雲影落秋霜

又

雨洗香苞乍出林
娟娟新綠盡成陰
穉龍不是泥蟠物
展出凌雲一寸心

題畫雪景

江天雲氣晚模糊
寒月凝光映玉壺
記得會稽殘雪夜
酒船橫過賀家湖

題白頭翁鳥

秋林山鳥啄紅梨
獨立何辭枳棘低
正值玄王初解網
白頭長惜一枝棲

題墨菊

黃花開遍近重陽
獨酌東籬酒一觴
不解醉中揮翰墨
金錢一夜染玄霜

題畫

碧空鴈影落湘潭搔首西風酒半酣
嘹唳數聲沙際落
喚將秋恨到江南

又

江雨吹風蜃氣腥暮雲秋色散漁燈
短篷一葉輕如許
載盡西山萬疊青

又

漁網風腥曬夕暉船頭吹火荻花磯
太平官課都輸足

釣得鱸魚換酒歸

又

松桂蒼茫帶夕霏
白雲如海護岩扉
鐘聲忽起西山外
知有僧房在翠微

又

秋香銷盡桂花叢
曉夢寒生蕙帳空
惆悵草堂人去後
至今猿鶴怨西風

又

雨餘嵐氣滴秋光
雲壓松梢鶴夢涼
不是隔林聞磬響
那知深處有僧房

又

西風嵐氣曉空濛
隔斷人間路不通
羨殺採芝林下客
一生長在白雲中

又

羅衾香冷玉壺冰
一片湘雲覆石稜
怪底翠鸞棲不穩
隔簾霜影照銀燈

海棠錦鳩圖

春鳩飛上海棠枝
正是華清睡起時
誰信繡衣花鳥使
內園竊出紫綿脂

和靖觀梅圖

梅花月冷鶴初還
占斷西湖第一山
不是當時甘隱逸
高名那得滿人間

憶故山

在山不覺山中好
纔出山中便憶山
安得結茅山下住

此身長伴白雲閒

鵓鴿圖

斑斑錦羽並名花
長戀軒墀度歲華
不是魏其門下客
等閒飛向別人家

又

雙披錦翼炯清眸
飛去飛歸得自由
況在春亭萱草下
只消相對便忘憂

花朝日久雨喜晴

宿雲消盡日華新
積雨開晴便可人
燕子未來花已謝
等閒空度一年春

海棠白頭翁鳥

臉痕紅膩點泥金
翠袖籠紗怯曉陰
山鳥忽驚春睡覺
花間雙咏白頭吟

墨菊

折得黃花插硯池
墨痕吹染傲霜枝
金錢璧玉俱無價
却笑陶潛不得知

書齋夜聞梔子香

芸館清虛夜氣涼
更闌月影漸侵牀
紗幮不礙薰風入
夢裏時聞簷蔔香

畫竹

湘波迢遞楚雲凝
欲寫幽懷寄剡藤
憶在玉堂同夜直
滿簾霜影對秋燈

春日久雨

閉門風雨倍思家
二月京城不見花
及至雨晴春已暮

空教惆悵惜韶華

雙鶴圖

梨雲夢冷月輪高
雙鶴長鳴出九臯
喞一聲聽未了
滿山風瀑響松濤

畫馬

赤汗生香濕紫雲
日光熒熒照朱幘
千金市得歸天廐
從此都空冀北羣

又

金繩絡腦翠絲韉牽出閑門立晚涼
曾駕鑾輿從巡幸
滿身猶帶御袍香

又

朝下驕翻碧玉蹄
圍人牽過五門西
太平無復巡瑤水
立仗天墀不用嘶

又

赤霜散作錦茸毛
骨骼昂藏八尺高
莫道驪黃誰解識
一朝還過九方臯

題神樂觀謝鍊師壁畫竹

冷風吹碎玉鏘鏘琳館高寒夕氣涼
坐待夜深山月上
一枝清影過東牆

題畫

青山脉脉水粼粼沙際秋莎疊軟茵
獨坐看山渾不覺
松花吹滿紫綸巾

送人歸鄉

問津亭下草斑斑艤棹春江送客還
我戀君恩歸未得

夢魂相逐到龍山

題族弟伯和聽玉軒竹石圖

挺挺脩篁石上生
南風吹動玉琮瑩
良材自有伶倫識
採獻明廷製鳳笙

題王友石畫

怪石巔岼玉一圍
碧烟寒薄護秋衣
醉中擊折珊瑚樹
驚起蛟龍作雨飛

題許監生麟山水

落花風細午陰涼
綠樹重行覆草堂
盡日山行人不見
隔林時送焙茶香

題畫

疎篁石上草斑斑
獨坐秋亭對碧山
祇有浮雲無管束
隨風飛去復飛還

題畫竹木

屋角秋烟冷未銷
冷風激激樹蕭蕭
西亭翠被餘陰薄
偷度新聲紫玉簫

題族姪公善所藏趙松雪唐馬

紫玉青錢錦作堆
渥洼奇種盡龍媒
肯淹卓犖甘芻豆
曾拜天墀獻壽杯

寒江獨釣圖

羣山如玉水如油
一舸漁竿晚未收
可是溪翁偏耐冷
滿蓑殘雪釣湘流

海棠黃雀圖

日暖宮花拆紫緜
沉香睡足曉粧妍
高枝亦許山禽宿

未必悲凄逐野田



三華集卷十四